



# QVÆSTIO MEDICA,

QVOD LIBETARIIS DISPUTATIONIBVS

MANE DISCVTIENDA,

IN SCHOLIS MEDICORVM,

die Iouis vi. Martij.

M. CAROLO LE BRETON.

DOCTORE MEDICO, PRÆSIDE.

*An senibus nocet meri potio ?*

I.

**P**ERFECTA dicuntur animalia quæ commixtione corporum & seminum vtriusque parentis generantur, & functiones edunt plures atque nobiliores, ideóque instructa sunt partibus calidis & frigidis, vt suo concentu sibi inuicem totique corporis moli temperiem concilient vitæ functionibus obeundis consentaneam. Solidas partes fouet spiritus à corde perenniter affluens; is corde ipso calidior est suæ originis momento, quum vteri calore accensus operari incipit, hoc est ipse non vivus vitam orditur. At ne suo in foco proprio ab æstu euavidus vitæ continuandæ esset inutilis, mox inspirati aëris & sanguinis ab hepate illabentis copulâ illigatus, & ab illis refectus abit in liquorem arteriosum pulsatilem perpetui motus authorem in corde & arteriis, eoque duplici motu rursus ardoris & sordium impatiens, toto corpore prænsat vberius refrigerium & expurgationem; tum demum maximè temperatur cum ab arteriis

A

in solidas partes dilapsus pleno fruitur consortio humoris primigenij temperatissimi & penè frigidi : interea illas vicissim beat sopitum in illis suscitans ignem , & ab humore primigenio in speciem vaporis vitalem euocat scintillam , quæ mox deditur in carnosas. His ea lux nisi affulgeret etsi in ætate quâlibet nutritionis & accretionis gaudeant beneficio , illo tamen vitæ destituerentur , vsque adeò tritum est ore Philosophorum , elementa inter se dissidentia mutuo complexu in gratiam sobolis eximias suas qualitates complacere , ac præcipuè nostro in genere calorem multo humore mitigatum vitam parturire. Cur eòdem quoque partu non semper enascitur sanitas vitæ delictum ? Cur nonnulli causarij in pœnam & morbum viuaces sunt ? Et contra non raro accidit sanis & robustis citò senescere & mori ? Scilicet alia sunt vitæ & sanitatis principia , quæ vt plurimum consentiunt. At illa interdum alio modo dispensat fatum. Hoc verò sibi accelerant homines quibus incautis neglectâ prorsus valetudinis curâ , cibo & potu intemperato vesci volupe est : præsertim si infirmi sint & senes , quos maximè lædit victus ratio omnis calefaciens & exsiccans.

## II.

**M**V S ex putri materiâ gignitur : cur equus simili modo gigni non possit naturæ arcanum est , quod mens nostra nullâ ratione potest reuelare : maiorem in equo si ais esse organorum apparatus , non persuades , hoc decus homini proprium est qui inter animalia præstantissimus , quod sit mentis particeps calidum innatum obtinuit vberimum , & purissimum. Idcirco illi instaurando materiam suppeditat umbilicus à matre probè subactam , quam foetus naturæ nutu , non pellectus escæ voluptate , coquendi labore nullo , omnem sibi apponit , neque nimiam neque parciorem , nullâque vehementi qualitate conditam. Ea est nascentis in utero caloris efficacia , eaque materiæ puritas , vt totus ferè migret in substantiam humidi primigenij. Infanti quoque in lucem edito pro umbilicali liquore mamma lac reddit temperatissimum , neque tamen ab eo æquè prompta & luculenta sit incrementi aut roboris accessio natiuo calori in illâ ætate & totâ pueritiâ , quum nimio natiuitatis humore

3

demersus lentius se mouens, cibum nequit superare si nimius est vel robustus. In senē rursus multò maior est natiui caloris infirmitas, cui exhausto penè humore primigenio, aqueo exuperante marcescunt viscera, vel saltem eam quæ olim fuerat hepatis sui benignitatem non experitur, ideòque minus firmâ vitur valetudine. Vna superest beneficentia spiritus à corde influentis: hic verò multâ face conspurcatus malignè lucet, malèque suo officio fungitur, vt illi supperat vel optimi cibi vberior commeatus illum agrè conficiet, quid non mali ab eo expectes si edulia solida vel potulenta ingerantur, quæ viribus polleant immodici caloris aut siccitatis? ea certè manebunt cruda, indigesta, corrupta, & ab iis succrescet plurima excrementorum illuuiēs, per patentēs vias & inania partium spatia oberrans, frequentissima & citissima vitæ perniciēs dolore stipata, vt quæ à senili marcore paulatim obrepit doloris expers.

### III.

**S**PIRITVS vitalis vbi calidum innatum integrat & vegetat temperatus est, is vitam assiduè fundit vsque ad mortem. At quoniam vt ignis sic spiritus & vita sine continuâ generatione subsistere non possunt, postquàm idem spiritus suum opus peregit, nempe aliquam vitæ particulam, necesse est vt aliam denuò instauret, aliud & omninò diuersum nutritionis munus ab illo obiri. In isto munere vehementissimè feruet partes solidas humoris primigenij custodes pererrans, quin etiam illas perureret nisi illi moderando commoda quam plurima suppeditasset natura. Aër pulmones & arterias totius corporis & spiritum ipsum vbi que temperat, neque id satis. Frigidi & humidi potus desiderium insuper additum est in animalibus viuiparis & pulmonem habentibus. Ita ne potus iste pulmones temperet & spiritum, qui cum sit natiui caloris portio nobilissima, quidquid aqueum est & prorsus frigidum & quidquid calidius est aut siccius fastidit vt sibi dissociata? Sanè potus non primò in pulmones delabitur, ne stilla quidem aut roris more: sed ventriculū subit pleno aluè. Hic chylum diluit, temperat, nec non vbi ventriculi & venarum consuetudine frigus suum infregit, sanguinem quoque temperat,

qui deindè multo sero dilutus cordis & spiritus incendia mitiget. Ideò potus belluis aqua frigida vbique prostat. Hominem magis iuuat sitim restinguere vino diluto quod humidum est & aëtu frigidum, simulque facultatem continet moderati caloris, quo citiùs & veluti compendio spiritus substantiam reficiat, vnàque illius aëtum soletur: quod homini commodissimum est qui jugi mentis agitatione spiritus quam plurimos consumit. Neque tamen tam multiplex refrigerium, spiritui vitali temperiem vitæ perennandæ conuenientem valet conciliare. Is enim à cordis foco semper aëtuans & siccus exit, nec cessat coctionum officinas si non perurere; exsiccare certè & infirmare. Sed quoniam eo modo est castigatus, infirmitas sensim obrepit & diù nullâ euidente labe, solâ temperamenti commutatione per inæqualia ætatum interualla & vices deprehenditur: sed tempore procedente cum primò affectum est hepar, dein ventriculus, tum chylum & sanguinem non benè subacta reddunt: & erunt crede mihi deteriora si merum propines; vt enim facilius est impleri potu, sic etiam lædi si in vitio fuerit, vt est istud portionis genus calidum nimis & siccum.

## IV.

**S**VCCORVM è plantis stillantium vel expressorum salij prorsus aquei apparent, alios facilè deprehendes exuberanti spirituum copiâ turgescere, & inter omnes maximè succum vvæ. Hanc vitis diù non sinit sapore acerbo vel acido immitem esse, vim caloris illi insitam promouent æstiuæ soles. Ab his excocta & maturescens diffluit succo dulci, musto nempè quod conflatum est vario & multiplici humore, crudo, vinoso, tenui, crasso, hunc fæcem & tartarum, illum vini florem nuncupant. In musto nullam inuenies particulam in quâ non sint confusa ista quatuor; nullam quoque esse puta in quâ non præualeat pars vinosa plurimo vbique fœta spiritu: cuius vis tantisper pressa mox erumpit & ignem concipit, omnesque totius multi particulas in totidem bullas & spumam agens, ab eo impura quæque segregat. Ab eâ ebullitione perfectâ coctione exit vinum, liquor limpidus purus immodicè calidus & siccus. Pu:

rum putum putares in vitro nitere spiritum. Is tamen de-  
ferbuit quum sepositâ & depressâ omni facie diffusus quo-  
quoersum, & in minimas partes diuisus atque oblitus  
crudo humore qui etiamnum in vino superest, inhibetur  
ne suo calore tactum feriat. Neque sic vinum desinit acu-  
to & acri sapore linguam faucesque vrere, & interdum ven-  
triculo quoque molesti ardoris sensum immittere, mox  
enim vt haustum est cæcus ille calor calori nostro additus,  
crudâ se exoluens materiâ vim accipit indomitam, quam  
vix ferant robusta iuuenum viscera, nedum imbecilla se-  
num, talem vini meri succum è cuius sinu liquidus ignis,  
titulo & specie aquæ ardentis educitur, an potum esse di-  
cis? An alimentum? An medicamentum? Verius dixeris  
tabificum senibus venenum.

## V.

**Q**VISQVIS senectæ limen ingressus est, jam tùm  
incipiat salubri disciplinæ morem gerere, vtcunque  
viridi adhuc & benè habito corpore sibi videatur vitæ mu-  
niis facere satis, suspectum habeat vigorem illum, qui bre-  
ui elanguescens postmodum concidet. Celari non potest  
ætas, cutis squallor, hebescent oculorum acies, & sparsa  
canis tempora satis admonent siccitatis & frigoris viscerum,  
& hæc jam tractanda esse molliùs humectante cibo & potu,  
qui etiam mediocri suo calore illa perfundens, natiui ca-  
loris vices obeat. Id agere plerique senes negligunt, ja-  
ctantes se inconsulto medico liberius viuere assuetos, non  
posse id ætatis grauissimum consuetudinis imperium detre-  
ctare. Verumtamen vt prima validæ senectæ tempora sint  
ferendo pristino victus mori quod spectat ad solidum ci-  
bum, non ideò pariter impunè ferent meri potum cui an-  
teactis ætatibus assueuerint. Quamobrem nisi eos vitæ sa-  
tias tenet primo quoque tempore immutent consuetudinem  
illam prauam & à naturæ legibus abhorrentem. Naturam  
si nesciant immodica quæque & vehementia respuere, me-  
diis & moderatis gaudere. Hoc illos docere poterant ani-  
malium ortus, natiuitas, vita, sanitas; liquet enim omnia  
naturæ munia & opera nonnisi largissimâ temperati humo-  
ris affusione elaborari & perfici: eademque intercidere &

corrumpi, quoties benignum illum humorem vel haurit siccitas, vel immodicus calor adulterat. Iam de nutritu, cum totus pendeat à probâ chyli temperie, vbi eum siccus & feruidus meri halitus infecit vel adussit, spes nulla est ab eo qui concepto alieno calore patrium dissipans, deinceps succos omnes corporis perturbet & confundat. Hac si minùs aduertant certè quod visum & auditum quotidie fugere illos non potest, quàm multiplici & quàm graui infortunio mulcentur quicunque senes facti merum bibere non desinunt. Illum excruciat arthritis dolorum omnium acerbissimus, qui tamen sanitatem demolitur non vitam; huic poplites obortâ artuum duritie contrahuntur; hydropè multi pereunt, tabe plurimi, non paucis ictus sanguinis spiritum intercludit, quos rarò à morte redimit æternum mansura paralyfis. Assiduo tremore nutant penè omnes: adeò impendent à mero morbi omnis generis tum calidi tum frigidi: omnium vna causa est infractus à mero neruorum tenor, quod fumis suis catarrhos ciens illos madesecerit, vel siccâ suæ fuliginis aurâ afflauerit. Miserum est profectò calamitatis genus, à quo vindicari expeditum fuerat si mero aquam affudissent. Hac facili ope vino suæ laudes constarent, tanta est in eo sic emendato lenitudo & suauitas, felix nutritio & quæ citò abeuntem spiritum reuocat, æquabilis ejusdem spiritus in corde diffusio lætitiæ parens, ad hæc mentis totiusque corporis vigor, quæ vini beneficia nullus vnquam senex à mero obtinuit. Profectò vt quisque minimo vino eoque diluto contentus esse assueuerit, ita fortunatam & longæuam vitam ducet maxime, qui secùs fecerit præsertim ingrauescente ætate, illi quantulacunque vitæ penus reliqua sit in corde, paruo spatium consumpta peribit.

*Ergo senibus nocet meri potio.*

Proponebat Lutetiæ **GVIDO CRESCENTIVS FAGON**  
Parisiinus, A. R. S. H. M. DC. LXIV.